

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

ZAKON

**O IZMJENAMA ZAKONA O ZAŠTITI I POSTUPANJU SA DJECOM I
MALOLJETNICIMA U KRIVIČNOM POSTUPKU**

Sarajevo, februar 2014. godine

PRIJEDLOG ZA DONOŠENJE ZAKONA PO HITNOM POSTUPKU

Postupajući u smislu odredaba člana 26. Poslovnika o radu Vlade Federacije Bosne i Hercegovine – prečišćen tekst («Službene novine Federacije BiH», br. 6/10, 37/10 i 62/10), predlažemo donošenje Zakona o izmjenama zakona o zaštiti i postupanju sa djecom i maloljetnicima u krivičnom postupku. Kao osnovni razlog za donošenje ovog zakona po hitnom postupku iz razloga što bi se usvajanjem ovog zakona izbjeglo nastupanje štetnih posljedica po Federaciju Bosne i Hercegovine, pa su u tom smislu ispunjeni uvjeti iz člana 191. stav 2. Poslovnika Predstavničkog doma Parlamenta Federacije Bosne i Hercegovine («Službene novine Federacije BiH», br. 69/07 i 2/08) i člana 186. stav 2. Poslovnika o radu Doma naroda Parlamenta Federacije Bosne i Hercegovine («Službene novine Federacije BiH» br. 27/03 i 21/09).

ZAKON

O IZMJENAMA ZAKONA O ZAŠTITI I POSTUPANJU SA DJECOM I MALOLJETNICIMA U KRIVIČNOM POSTUPKU

Član 1.

U Zakonu o zaštiti i postupanju sa djecom i maloljetnicima u krivičnom postupku ("Službene novine Federacije BiH", broj: 7/14) u članu 192. st. 1, 2. i 3, članu 193, članu 194, članu 195, članu 196. st. 1. i 3. i članu 197. st. 1 i 2. riječi: „stupanja na snagu“ zamijenjuju se riječima: „početka primjene“.

Član 2.

Ovaj zakon stupa na snagu narednog dana od dana objave u "Službenim novinama Federacije BiH".

O B R A Z L O Ž E N J E

O IZMJENAMA ZAKONA O ZAŠTITI I POSTUPANJU SA DJECOM I MALOLJETNICIMA U KRIVIČNOM POSTUPKU

I – USTAVNI OSNOV

Ustavnopravni osnov za donošenje ovog zakona sadržan je u odredbi člana IV.A.20. (1) d) Ustava Federacije Bosne i Hercegovine, kojim je propisano, da je Parlament Federacije Bosne i Hercegovine nadležan za donošenje Zakona o vršenju funkcije federalne vlasti kao i odredbi člana IV.C. 3. Ustava Federacije Bosne i Hercegovine.

Ustavnopravni osnov za donošenje ovog zakona je utvrđen prilikom njegovog prvog usvajanja.

II – RAZLOZI ZA DONOŠENJE ZAKONA

Osnovni razlog za donošenje ovog zakona jeste usklađivanje odredbi čl. 192. st. 1, 2, i 3, 193, 194, 195, 196. st. 1. i 3. i 197. st. 1. i 2. sa odredbom člana 202. Zakona o zaštiti i postupanju sa djecom i maloljetnicima u krivičnom postupku. Naime, uvidom u tekst zakona utvrđeno je da navedene odredbe nisu usklađene sa opredjeljenjem člana 202. Odredbom člana 202. Zakona o zaštiti i postupanju sa djecom i maloljetnicima u krivičnom postupku propisano je da isti stupa na snagu osmog dana od dana objavljivanja u „Službenim novinama Federacije BiH“, a primjenjivat će se istekom godine dana nakon stupanja na snagu. Uvidom u prijelazne i završne odredbe ovog zakona, odnosno navedene odredbe članova, utvrđeno je da bi primjena istih izazvala nedoumice, a posebno u vezi sa citiranom odredbom člana 202. navedenog zakona. U tom smislu pristupilo se izradi izmjena navedenog zakona kako bi se u što kraćem roku otklonile moguće negativne posljedice neusklađenosti ovih odredaba.

III – OBRAZLOŽENJE POJEDINIH ZAKONSKIH RJEŠENJA

Odredbom člana 202. propisano je da Zakon o zaštiti i postupanju sa djecom i maloljetnicima u krivičnom postupku stupa na snagu osmog dana od dana objavljivanja u „Službenim novinama Federacije BiH“, a primjenjivat će se istekom godine dana nakon stupanja na snagu. Uzimajući u obzir da je ovom odredbom propisan „vacatio legis“ u primjeni ovog zakona, odnosno da se primjena istog odlaže godinu dana od dana stupanja na snagu, omaškom prilikom izrade citiranog zakona u navedenim odredbama na kojim se vrši intervencija putem ovih izmjena, korišten je izraz „stupanja na snagu“. Naime, da bi se izbjegle nedoumice u praksi, a posebno u primjeni prijelaznih i završnih odredaba citiranog zakona, potrebno je izvršiti korekcije, te riječi: „stupanja na snagu“ zamijeniti riječima: „početka primjene“.

IV – FINANSIJSKA SREDSTVA

Za sprovođenje ovog zakona nije potrebno osigurati dodatna finansijska sredstva u Budžetu Federacije BiH.

ODREDBE ZAKONA KOJE SE MIJENJAJU

Član 192.

Važenje pravomoćno izrečenih odgojnih mjera

(1) Odgojna mjera pojačanog nadzora roditelja, usvojitelja ili staratelja, pojačanog nadzora u drugoj porodici i pojačanog nadzora nadležnog organa socijalnog staranja koja je pravomoćno izrečena do dana stupanja na snagu ovog zakona ne može trajati duže od vremena propisanog ovim zakonom.

(2) Zavodska odgojna mjera upućivanje u odgojnu ustanovu, upućivanje u odgojno-popravni dom i upućivanje u drugu ustanovu za liječenje i osposobljavanje koja je pravomoćno izrečena do dana stupanja na snagu ovog zakona ne može trajati duže od vremena predviđenog ovim zakonom.

(3) Zavodska odgojna mjera pravomoćno izrečena do dana stupanja na snagu ovog zakona punoljetnoj osobi koja je učinila krivično djelo kao stariji maloljetnik, a u vrijeme suđenja nije imala navršene 23 godine života, zamijenit će se odgojnom mjerom pojačanog nadzora organa socijalnog staranja.

Član 193.

Pravomoćno izrečena kazna maloljetničkog zatvora

Kazna maloljetničkog zatvora pravomoćno izrečena do dana stupanja na snagu ovog zakona u trajanju dužem nego što bi se mogla izreći prema odredbama člana 51. stav (1) ovog zakona, smanjuje se prema odredbama ovog zakona.

Član 194.

Postupanje u odnosu na zastarjelost izvršenja kazne

Odredbe člana 56. ovog zakona primijenjuju se na zastarjelost izvršenja kazne maloljetničkog zatvora i kada je presuda izrečena prije stupanja na snagu ovog zakona, ukoliko zastarjelost već nije nastupila.

Član 195.

Rehabilitacija

Odredbe člana 60. ovog zakona o rehabilitaciji učinilaca krivičnih djela osuđenih na kaznu maloljetničkog zatvora primijenjuju se i u odnosu na osuđene prije stupanja na snagu ovog zakona, ukoliko rehabilitacija već nije nastupila.

Član 196.

Dosadašnji krivični postupci

(1) Krivični postupak pokrenut prije stupanja na snagu ovog zakona, nastaviti će se prema ovom zakonu, ako ovim zakonom nije drugačije određeno.

(2) Predmeti iz stava (1) ovog člana koji se nalaze u fazi pripremnog postupka dostavit će se odmah tužiteljstvu, a ako je u toku izvršenje pojedinih istražnih radnji, u roku osam dana od dana početka primjene ovog zakona.

(3) Ako je do stupanja na snagu ovog zakona donesena odluka protiv koje je prema odredbama Zakona o krivičnom postupku i drugim zakonskim propisima iz ove oblasti dozvoljen pravni lijek, a ta odluka nije dostavljena osobama koje imaju pravo na pravni lijek, ili ako je pravni lijek podnesen, ali o njemu još nije odlučeno - u pogledu prava na pravni lijek i postupak po pravnom lijeku primijenjuju se odredbe Zakona o krivičnom postupku.

Član 197. **Računanje rokova**

(1) Ako je na dan stupanja na snagu ovog zakona u predmetima koje on regulira bio u toku kakav rok, taj rok se računa prema odredbama ovog zakona, osim ako je rok po dosadašnjim propisima bio duži.

(2) Odredbe čl. 100., 101. i 102. ovog zakona o rokovima trajanja pritvora primijenjuju se u predmetima započetim nakon njegovog stupanja na snagu.